

Sicole

Les cawete -eur et -eure

Li cawetes -eur, c' est ene cawete [suffixe] acawêye a èn addjectif, ki mostere li cwålité di cist addjectif la :

lådje => lårdjeur ; long => longueur ; spès => spexheur ; grand => grandeur ; hôt => hôteur (*hôteûr, yonteûr, wôteûr*) ; tchôd => tcholeur ; froed => froedeur ; rodje => rodjeur ; vert => verdeur ; noer => noereur ; blanc => blankeur ; tinre => tinreur ; tiene (*tièd*) => tieneur (*tièdeûr*) ; froed => froedeur ; maigue => maigreur ; gros => groxheur.

Des côps, on n' ritrove nén l' addjectif : mayeur.

Des ôtes côps, li rapoirt n' est nén clair : måle (*mwaijhe, mauvaise, méchante*) => måleur

So Nameur et Tchålerwè, li R del fén disparexhe : *laurdjeû, longueû, nwâreû, vèrdeû*

Cawetes vijhenes :

* -té : peur => purté ; grandiveus => grandiveusté ; rance => rançté ; seur => surté ; pãjhire => pãjhirté ; niche = nichté

* -sté : metchant => metchansté ; mannet => mannesté ; mæssî => mæssîsté.

* -isté : tinrûle => tinrûlisté ; pãjhûle => pãjhûlisté ; noer => noeristé (c' est bråmint des noûmots foirdjîs diviè 1900) ; prumî => prumîristé [*priorité*]; plinne => plinnisté [*gravidité*].

* -esse : bas => bassesse ; fel => felesse ; fwebe => fweblesse.

Gn a ene ôte cawete -eur po des mots calkés do francès : tracteur, docteur, indjenieur, moteur, facteur

Li cawete -eure, c' est ene cawete acawêye a on viebe, ki mostere ene pitite pãrtêye do rzultat di l' accion.

coixhî => coixheure ; netyî => netieure ; purer => pureure ; splitchî => splitcheure ; blessî => blesseure ; bate => bateure ; sorbate => sorbateure ; sbijhî => sbijheure ; bîler => bîleure ; crever => creveure ; peter => peteure ; spiter => spiteure ; creuzer => creuzeure ; schaver => schaveure ; screper => screpeure.

Des côps, on n' trove nén l' viebe : sclameure.

Cisse cawete la candje bråmint avå les accints do walon : coixheure : cwaheûre (Lidje) ; cwahore (Vervî) ; cwahâre (Mamdiy) ; cwachûre (Bive, Nameur) ; cwachure (Nivele)

Eciclopedeye :

Li pesse des pourceas d' Afrike

Li pesse des pourceas d' Afrike, c' est ene maladeye des coshets cåzêye pa on virûsse, diferin do ci del pesse des pourceas lomêye "classike".

Minêyolodjeye (kimint ki l' maladeye si prind)

Po l' virûsse si spåde, i fât on spès ratroplaedje di biesses. C' est insi dins les poitchreyes [*porcheries*] mins nén dins les bwès (cas del pesse dins les singlés).

Li maladeye a stî ricnoxhowe e l' Afrike e 1907.

Elle arive pol prumî côp e l' Urope, e Portugal (k' a co totes ses colneyes [colonies] d' Afrike) e 1957. Did la si csemer e l' Espagne, pu el France. Gn a ene minêye [*épidémie*] el Beldjike e 1983 (dins les coshets), mins on l' dizindjnêye [*duzingne, éradique*] dizo l' no del pesse classike (dandjreus k' i gn aveut co pont di lwè po touwer les biesses di cåze del pesse afrikinne). Ci grande minêye la, edjîstreye e l' Espagne et l' Portugal finit diviè 1995.

E 2007, gn a ene novele minêye ki cmince el Djeyordjeye, pu si stinde sol Rûsseye ; e moes d' awousse 2012, elle est e l' Oucrinne ey e moes d' djun 2013, el Bielorûsseye. E 2014, elle acsût l' Litwaneye et l' Pologne. , Pu, e moes d' djun 2017, li prumî cas est rapoirté e l' Tchekeye.

E 2018, ene novele minêye dins les singlés diviè l' 15 di setimbe. Li prumî cas a stî trové a Etale. Li 5 d' octôbe, gn aveut ddja 32 singlés k' avént stî trovés pôzitifs å labo. Li mã a dandjreus vnou avou des singlés apoirtés d' Pologne po rahessî les bwès dvant les tchesses.

Senes del maladeye

Li copete des orayes est sovint rodje. On î voet come des pitès voennes. Mins c' est nén åjhey di vey les sintomes so les singlés vicants.

Espaitchance


Gn a nol eploctaedje, ârvier del pesse des pourceas classike. Po reclôre li maladeye, on touwa pol botchreye 4000 pourceas, et-z espaitchî les djins d' aler dins les bwès.



Cas 2018 : triyngues : singlés ; ronds : coshets

Belès-letes : sicrijheu e-n inglès ratourné e walon

Les aviretes / paskeyes da Alice e payis des merveyes



Lewis Carroll, di s' vrai y no **Charles Lutwidge Dodgson**, a vnou å monde a Daresbury, ene pitite veye di l' Inglutere, li 27 di djanvî e 1832, et il a morou li 14 do minme moes a 1898.

Il esteut mwaisse di matematikes e *Christ Church College* a Ocsfôr [Oxford]. I s' a interessé ossu al fotografeye.

Li 4 di djulete e 1862, i fjheut on toû e naçale sol Tamijhe avou les troes feyes dâ doyen di s' sicole, Édith (8 ans), Lorina (13 ans) eyet Alice, k' aveut ses 10 ans ç' djoû la minme.

Les bâsheles li taenît po k' i lzî racontaxhe ene istwere. Et lu emantchî li fâve d' ene lomêye Alice ki shût on blanc lapén ecayté d' on coirsulet avou ene monte, diski tot å fond di s' terêye.

Li live a stî rmetou deus côps e walon, aprume pa Jean-Luc Fauconnier (dizo l' tite « Les aviretes da Alice e payis des merveyes » (2015). Adon-après pa Bernard Louis ki l' riloma « Les paskeyes d' Alice e payis des merveyes » (2017). On pout atchter l' live sol waibe « Amazone ».

Dins l' terêye del robete

Alice kimincive a nd awè s' sô d' esse ashîte sol hourlea dilé s' sour a n' rén fé. (...) Et tot d' on côp, on Blanc Conin [*lapin*] avou des rodjes ouys a passé djuste divant zels e corant vinte e tere.

I gn aveut rén d' si drole a ça, et Alice n' a nén trové si ewaerant k' ça d' ôre li lapén, ki câzéve tot seu, dire : « Nottotoute di nottotoute ! Dji va esse târdou ! » (pus târd, cwand elle a rsondjî a ç-t afwaire la, i lyi a vnou e s' tiesse k' elle åreut dvou esse saizeye, mins sol moumint, ça lyi a shonné vormint naturel k' on lapén djâze po lu tot seu).

Mins cwand l' lapén a rsaetchî ene monte foû del potche di s' coirsulet po l' riwaitî, et pu k' il a bizé evoye, Alice s' a levé d' on lan, tot tuzant k' ele n' aveut djamây veyou – divant ç' djoû la, todi – ene sâvaeje robete mousseye d' on djilet ås gossets k' on è pleut rsaetchî ene monte.

Curieuse come on djonne d' agaesse, elle a corou padrî lu, e trevâtchant tchamps et labeurs, tantea k' elle l' polou vey si stitchî dins on grand trô metou padzo ene håye di blankès spenes.

Ene miete après, Alice a broké padrî lu, sins ddja s' dimander kimint k' elle è sâreut vni foû.

Tchanson

Li bouneur est râle

I. Dji n' tchantrè pus, mamjhele po vos beas iys / Dj' a tot pierdou, eyet c' est po todî. / Vos estoz evoye di l' ôte costé del Tere ; / Èm cour s' anoye ; adon dji vôreu braire. / Mes iys sont setchs ; dji vos inméve trop foirt / Mågré vos betchs, asteure, l' amour est moirt.

Resploe

Dji n' sai pus cwè fé ; dji n' sai pus cwè dire / Èm-n amour a sketé ; djel vôreu co bén vir / El bouneur est å diåle, c' est ene sacwè d' si râle ; / On l' vôreu bén rtini, il est ddja fotou djus (2 côps)

II. Dj' a tot pierdou, et c'est po todî / Dji n' tchantrè pus, mamjhele po vos beas iys / Si dj' aveu peu di télmint vir voltî / Mins esse ureus n' ersaetche nén les dandjîs / Si enawaire, elle esteut dins mes bresses / Asteure, tofer, dins m' reve, dji cache après.

å resploe

III. Droci i mi dmeure co mes pus beas trezôrs / Å fond des beurs, des fosses d' årdjint et d' ôr / Låvå dins l' tiesse li fond est disbåtchî / ki vôreu resse avou leye, mins todî / El tins passé s' eva et n' ervént pus / El tins passé yet ses beas djoûs stepnut.

å resploe



Wiyame Dinker a Bive
(avou Pire Otdjåke)



André Gauditiaubois

*Tecse : André
Gauditiaubois ;
muzike et
tchantaedje : Wiyame
Dinker*